

فتحي فرج

الحلم الصغير

شعر

الطبعة الثانية يولييه 2020

بطاقة الكتاب

عنوان المؤلف	الحلم الصغير
المؤلف	فتحي فرج
التصنيف	شعر
رقم الإيداع القانوني	2020 - 10549
الترقيم الدولي	978-977-6771-94-9
رقم الإصدار الداخلي	627 الطبعة الثانية يولييه 2020
عدد الصفحات	100 صفحة

جميع حقوق الطبع والنشر محفوظة للمؤلف، ولا يحق لأي دارنشر طبع ونشر وتوزيع الكتاب أو ترجمته أو الإقتباس منه أو نشره على النت الا بموافقة كتابية وموثقة من المؤلف

مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 020554372901 طيناكس: 01202541192 - 01116202218 - 01011256943

النييل والفرات     nagyegy200064@gmail.com

   alnilewaalfourat@gmail.com

المقر الرئيسي: ج.م.ع. محافظة الشرقية - العاشر من رمضان - مجاورة 13 - أمام سنتر الـ13 - قمار 304

على سبيل التقديم

لكل مبدع مشروع الإبداعى الذى يسعى لتحقيقه وتقديمه للتاريخ ، وهمه الوطنى الذى يتجلى فى تحقيق إشاكلية (اليوتوبيا) المدينة الفاضلة على أرض الواقع وحلم الوحدة العربية ، وأن يخصص شاعر ما كتابا كاملا عن الهم القومى والحلم الأبدى فلا بد أن يكون حاملا لكم كبير من المشاعر الوطنية والإنتماء الجاد والفعال للوطن .

والشاعر فتحى فرج يقدم هذا الكتاب والذى يجدد فيه الحلم ويطرح إشكاليات التوحد معه والإنتماء له ولم يبدأ بنهوض الأفراد ولكنه بدأ بالوطن نفسه فيقول (إحنا النهارده بيتولد / فينا الأمل قوم ياوطن / لملم جراحك وابتدي / بلاش يعود فينا الوهن / لازم هاتقدر يا وطن) وهو ما يهدف إليه من نهوض الوطن ليتصدر المشهد من جديد ورغم فورة المشاعر الوطنية التى اجتاحت الشاعر إلا أنه لم يتخل عن فنيات النص مستخدما طريقة الفلاش باك كثيرا والإسقاطات الرمزية لينقل الصورة الواقعية من خلال أبسط التعبيرات .

ناجى عبد المنعم

الإهداء

بحلم حلم صغير حباب
يلا نحارب في الإرهاب
ويدوم عدل وأمن في بلدي
وبلاش نسمع للكذاب
ايدى في ايدك يلا يا ولدي
نمحي الشر من الأعتاب
بحلم حلم صغير!!

فتحي فرج

قوم يا وطن

إحنا النهارده بيتولد
فينا الأمل قوم ياوطن
لملم جراحك وابتدي
بلاش يعود فينا الوهن
لازم هاتقدر يا وطن
تدوس على كل المحن
وراح نقول كلمة وفا
دايما بحبك نفتخر
قوم يا وطن
أنا من ترابك ياوطن
أنا من جدود طافوا البلاد

بايد راح ازرع في الصحر
وايد تعلم في الولاد

وايد بتبني مجدها
وايد بتسهر ع الزناد
وقفة بتحمي أرضها
وايد تدندن ع الوتر

قوم يا وطن
قوم يا وطن ياللي ولادك
في المحن خير الجنود
نادى رسولنا وقاللنا
صحوا الهمم وارعوا الحدود
وقال هايسطع نجمنا
لما نداوم ع السجود

وقال هيكبر حلمنا
لما يفتح ع الشجر
قوم يا وطن

قوم يا وطن صحي شبابك
للعمل مش بالعقاب
لازم يكونوا في حضننا
وف قلبنا مش في الضباب
لازم يعودوا لأرضنا
ويعمروا بعد الغياب
وراح يعيشوا بالأمل
وراح يطلوا ع القمر
قوم يا وطن

ضميني مصر

محتاج أبوحك
بالأسرار
ولا يوم راح أصبر
على بعدك
شغلتي صورتك
ليل و نهار
وسبقت أشواقي لحبك
وفضلت انادي
خديني مصر
يايدك مصر
ضميني مصر

محتاج اقولك
عالي في قلبي
دا الشوق غلبي
وعقلي طار
من أجلك انت
خلقتي ربي
واخاف عليك
من مكر جار
واموت فداك
غريق في حبي
واحمي حماك
في كل دار
خديني مصر
ضميني مصر

دعوة نبينا أجمل شعار
في جهاد ولادك
على أرضك
إدينا فرصة نبدأ عمار
وبلاش تضيع أحلام إبنك
ليدوق مرارة الإنكسار
ويعيش يدور على حضنك
خديني مصر بإديك مصر
ضميني مصر

مشاريع كبيرة
برعايتك انتِ
والصورة حلوه
باينة في حياتك

وجيوشنا فيك
عمرك ما خنتِ
وانتِ الأميرة ملكة في سباتك
وبعد حيرة رسيّت سفينتي
على شطك انتِ
يامصر ذاتك
خديني مصر
بإيديك مصر
ضميني مصر
محتاج أبوحك بالأسرار
ولا يوم راح اصبر على بعدك
خديني مصر
بإيديك مصر
ضميني مصر

الخلوة دي حبيتي

الخلوة دي حبيتي
ماشفتش زيها
بتنورلي مدينتي
وف قلبي حبها
وأقول حبيتي مصر
ومحدثش يوم يقولي
الخلوة دي ملهاش بر
وانا لو غريق تاخدني
بعيد عن كل شر
الخلوة دي حبيتي

وف ليلة تقولها
محدث قبلها
خلاك تعيش العمر
وليلة تروح وتجري
تحضن ترابها بدري
دي حببتي وهى عمري
أم العيون السمر
مهما الزمان يعاكس
مقدرش اكون مشاكس
ولا هامشي في المعاكس
واقول ده منها أمر
الحلوة دي حببتي

ياريت يكون تملّي
في عنيا صورة مني
ونيلها الحلو يجري
يحكيها كلمة عني
ده مصر ساكنة قلبي
مهما الزمان يمر
الحلوة دي حبتي

الحلم الصغير

بحلم حلم صغير ومقطط

القى وليدي في بيتي مزقطط

مش راح يصحى في يوم متلخبط

بحلم حلم صغير

بحلم حلم صغير في الايد

ألقي الدنيا وقلبي سعيد

أزرع أرضي وتكبر بلدي

والقى ولادي بلبس جديد

والقى الكل معايا بيفرح

لما الخير حوالينا يزيد

بحلم حلم صغير

بحلم حلم صغير يابلادي
يطلع كل الورد يزهر
نصنع منه الخير لولادي
والمستقبل مش هايكشّر
نبني نعمر فوق في الوادي
والتعليم والصحة نكبر
بحلم حلم صغير

بحلم حلم صغير حباب
يلا نحارب في الإرهاب
ويدوم عدل وأمن في بلدي
وبلاش نسمع للكذاب

ايدى في ايدك يلا يا ولدي
نمحي الشر من الأعتاب
بحلم حلم صغير

بحلم حلم صغير واتمنى
إني أكون في رياض الجنة
جنة خلد وفيها رضوان
مش بيوسوس فيها شيطان
وولاد بلدي على الشطآن
تحمي تراب منقوش بالحنة
بحلم حلم صغير

أنا ابن بطنك يا بلد

أنا ابن بطنك يا بلد
نبته أبويا اللي اتولد
عايش في أرضك من زمن
باهتف بإسمك للأبد
مقدرش اخون عهدك يا أمي
لا يقولوا يوم ابنك شرد
مقدرش أنسى نبض قلبي
بيني وبين الطين مدد
أنا ابن بطنك يا بلد
وعرفت آية في الكتاب
بتقوللي آدم من تراب

وبأمر ربي في الأذل
لقيتني وحدي وسط غاب

وقابلت حوا على الجبل
لما انكشف عنا الحجاب
غمرتنا أشواق الأمل
وكانها لحظة عتاب

وفضلنا ننحت في الصخور
ناكل في أوراق الشجر
ولقينا مشوارنا ابتدئ
وسهرنا على ضي القمر
طلع النهار كبر الولد
ومضى الزمان غنى الوتر

وبنيت حصون أنا والكبار
تحمينا من كل الشرر
أنا ابن بطنك يا بلد

باتمنى اشوف على سكتك
زرع البنات يطلع ينور
نصنع دروع في محبتك
أو طيارات نقدر نطور
نقطف ثمار من جنتك
ويكون حقيقي مش مصور
ونموت فداك ف محنتك
ولا نلقى يوم ابنك مزور
أنا ابن بطنك يا بلد

في يوم خدنتي الدنيا منك
ونسيت شعار أرض الهرم
رجعت أحضن في العلم
و عرفت مين أصل الكرم

واتمنى اشوف كل الشباب
راح يعرفوا نون والقلم
راح يعرفوا معنى الحساب
راح يصعدوا بين الأمم
أنا ابن بطنك يابلد

يا ساكنة في قلبي يا بلادي

ياساكنة في قلبي يا بلادي

وأولادي وكل الناس

يا بلدي يامصر

في هلة بدر بهمسلك

وانام واصحى على اسمك

وظلعة شمس ترقصلك

فروع الورد على غصنك

يا أجمل كلمة بكتبها

تبان لي حروفها زي الماس

يا ساكنة في قلبي يا بلادي

بناي شعارك الغالي
بأعلى صوت في مدرستي
بلاي وتحيا أوطاني
بتملى صورها كراستي
واخببك من الوسواس
وكل ولادي دول حراس
يا ساكنة في قلبي يا بلاي

تموت بالغل حسادك
وتبني المجد أولادك
ونزرع خير لأحفادك
واصلي الفرض في رحابك
وتفضل صورتك الحلوة
ما يكفيها ميزان حساس

يا ساكنة في قلبي يا بلادي

وأولادي وكل الناس

يا بلدي يا مصر

يا مصر منوره دائماً

يا مصر منورة دائماً
كأنك درة بتلاي
ضفايرك حلوة مفرودة
بتهفهف كايده عزالي
وستايرك ورد منقوشة
ومعاكي الخير وجيالي
وعيون الكره مدسوسة
حاسدينك وانت في العالي
ودواعي الشر منحوسة
بتقطع جبل أوصالي
وبفضل المولى محروسة

يا نسمة صيف بتحلالي
العلم سلاحك الأول
والأمن وجيشك الغالي
وبمّية نيلك الدافية
تحلو الدنيا تصفالي
وتاريخك سطره جدودي
تهواه الأهل وعيالي
وحنانك سر لوجودي
من أجل أمي دعيالي
يا مصر منورة دائماً
في عينيّ وكل أمثالي
يا مصر وموطني انت
لو طال العمر ترحالي

أعذريني

أعذريني يا حبيبتي
يا مليكة قلبي انت
أعذريني قبل ما عرف
اني احب ترابك انت
أعذريني
أحلى وردة يا مدينتي
بين ايديّ باهديهاك
في ربوع النيل سكنتي
وابتسامتك في رمالك
وان شكيت في البعد عنك
تضحكيلي ببيان جمالك

والقى روعي عشان بحبك
أجري واحضن طرف شالك
أعذريني

مش بيدي

تطرح الأغصان في يدي

مش بيدي

أمنع الأحزان بصدي

وأفضل احلم

تفرح الأولاد بكدي

وادفن الإرهاب بيدي

وافدي ابنك من التردي

إزرعي عشان تعدي

واصنعي ولا يوم تهدي

أعذريني

أشتري الأفراح بكام
وامنع الارهاب بكام
وارسم الأحلام كلام
يا سلام على السلام

لو فضلت العمر أرسم
هالقي جنبي في يوم زحام
ناس بتجري تحمي صورتك
وناس بتحلم بالغرام
أعذريني

مصر ياللي شغلني قربك
لو وضعت شموع في كفك
أو كتبت ديوان في مجدك
مش هاوفي حق وصفك

والقي شمسك بتناديلي
أزرع الأحلام في أرضك
والفي نيلك بين نخيلي
يسقي كل الورد حبك
أعذريني

مركبنا عدى القتال

مركبنا عدى القتال

طلت عليه الشمس

طلعت معاه الرجال

تحيي قرار الأمس

قامت بدك الجبال

والفرحة صارت عرس

رفعت تلال الرمال

وبكراكات الأئس

ضحكت وراها الأمال

وبأعلى صوت مش همس

مركبنا عدى القتال

ورئيسنا خطى المحال
واتنفذت قرارات
عاد التاريخ نفسه
واتسطرت حكايات
ربط القديم بالجديد
رسم الطريق في ساعات
لان الكلام والحديد
عزف الوتر نغمات
لعب الزعيم الدور
ملقاش في يوم أزمات
مركبنا عدى القتال

مركبنا دولة مصر
وبلاد معاها كتير

في الصبح أو في العصر
هيعود علينا الخير
نبنّي نعلّي القصر
طواف علينا الطير
محروسة يا ولاد مصر
من عين تضر الغير
دايماً خطاوي النصر
يامصر في التبكير
مركبنا عدى القتال

فرحت ولادنا الصغار
رقصت مع الحرية
والحلم أصبح نهار
بدأت خطى التنمية

مصر الحبيبة عمار
ورجالها دول أوليه
مهما طغى الأشرار
مراكبنا رايحة وجيه
من غير دولار ودينار
كل الجهود مصرية
مركبنا عدى القتال

في الواقع

في الواقع أنت مدرستي
ورسمتك جوه كراستي
ازاي بهواك يا حبيبتي
وانساك واترك الواقع

في الواقع انت نبراسي
وطريق الحب احساسسي
لحياتي وموتي مش ناسي
وتقولي اني مش واقع

في الواقع مصر محبوبة
مش ممكن تبقي منكوبة
راح اصلي وادعي بالتوبة
من ذنب في دنية الواقع

في الواقع بكره الدلشه
لو عشت العمر في دهشه
راح تكمل فكرتي الهشة
ولا تطلع مصر مش واقع

أحلامي يامصر في ايديك
وشعار الحب في عنيك
يا أجمل لحظة بنعيشها
مش ممكن نهدم الواقع

راح نبني الواقع الدائم
ونأسس بيتك العايم
لو هم الناس على كروشها
ونقضّي العمر في الواقع

في الواقع مصرنا غنوة
وهنبعد كل من خانها
وهيفضل جيشها ويصونها
ويعلي المجد في الواقع
وهيصبح حلمنا واقع

منصورين

منصورين

احنا بجيوشنا ...

منصورين

منصورين

ولا شئ يحوشنا

منصورين

منصورين

يا شباب بلادي

في طور سنين

منصورين

لو للأعادي سور حصين

منصورين

بالأمل تكبر
بلدنا والولاد
والعمل خلى المصانع
في ازدياد
نور شموع العلم
ضي الاتحاد
ضحكت مزارع ورد
بأحلى زاد
منصورين
دايماً ولادنا
في كل واد
منصورين
احنا بجيوشنا
منصورين

أنا حلم عمري

أنا حلم عمري

ألقي كل الخير يارب

وألقي كل الناس تحب

أنا حلم عمري أعيش لمصر

أنا حلم عمري

ألقي شمس الصباح هلة

وابتسامة الورد طلة

يطلع العصفور يغنى

تصبح الأولاد تصلي

وألقي خلي زي ضلي

وألقي نفسي في أحلى أرض

ناس تعيش العمر جد
وناس بتبني مش تهد
والقى كل الخير يارب
والقى كل الناس تحب
أنا حلم عمري أعيش لمصر

أنا حلم عمري
يعلى نجمي وأكون مثالي
والقى كل الدنيا حلوة
بين شموع النور قبالي
أزرع الأحلام في غصنك
يطرح النوار يلالي
والقى بلدي الحلوة جنة
تحصد الخيرات عيالي

والقى كل الخير يارب
والقى كل الناس تحب
أنا حلم عمري أعيش لمصر

أنا حلم عمري
يزرع الفلاح في أرضك
ينجح التعليم بابنك
والصناعة سلاح لمجدك
ده انت أصل الخير يابلدي
ساكنة قلبي وقلب ولدي
وان شكيت أو بكيت
ألقي دمك جوه كبدي
بيحاكيني وينادييني

والقى روح الود عندي
بأقي ع الإخلاص في عهدي
والقى كل الخير يارب
والقى كل الناس تحب
أنا حلم عمرى أعيش لمصر

على موعد

على موعد
بلقائك حبيبيتي
مقدرش أمانع
في وصالك
راح اقابلك
والفرحه في قلبي
مستني علي
شط قنالك
وفي حبك
بارفعلك رايتك
وهاجيلك

من قبل سؤالك
وارسملك صورة
على ارضك
يغازلها النيل
من فوق شالك
ياما قالوا
على فرحة قلبك
مش ممكن
أبدأ تهالك
وازاي انا أصبر
على بعدك
وانا قبل النشأة
في رمالك
بكتبك قصة

في ميت غنوه
وفي ذكرى النصر
بقولهاك

آه يا ست الحسن
يا سنيوره
باتمنى
ما يغيبش جمالك
وتكون مشاريعك
فورية
من أجل
شبابك ورجالك
على موعد
باستنى عيونك

والفرحه
في رنة خلخالك

على موعد

من يوم
ماعرفتك والدينا

رسمتك صورة

الله اكبر

سبقتني

عصافير الجنه

وقالتك

سبحان من صور

على موعد

وهناك ع المينا

الشعب
هيفرح ويكبر
مش ممكن
تنجح أعادينا

طول ما الأمجاد
راح تتكرر
من وقت ما بدأت
خطاونا
حظك يا بلادي
اليوم أوفر
كل الأحلام
راح تناديننا
وفي ستة تمانية

هاتتسطر
واليوم ده
جيوشنا على سينا
راح تمحي
الارهاب وتعمّر
أرقصي يا زهور
على أراضينا
راح يكبر
مشروعنا الأصغر
والخير هايزيد
مع أهالينا
وهتفرح مصر
وتتمخطر
على موعد

روح قلبي يا مصر

أنا إبنك

وانتِ المصرية

وطباeck

حلوة وعصرية

روح قلبي يامصر

أزرع بستان

المجد زهور

واشرب م النيل

في الصباحية

والقى ف أحضانك

أحلى عطور
وأفرح بنهار
والدنيا عمار
وبعزم الهمة الفعلية
بدأت خطوات التنميه
وأنا إبنك
وأنت المصرية
باستنى فى ضلك
وحشاني
وعشان أنا خلِكَ
ريداني
وأشعر بحنان الحب زمان
وأزاي أنا أبعد
من تاني

وأفضل حيران

الليل سهران

ما كتبتش قصه

ولا حكايه

والقائك بتفرحي ويايا

وانا ابنك

وانت المصرية

بحلم بصباح منقوش حنه

وادعيلك

رب يكون راضي

يكمل بحصولك ع الجنه

راح تسعد

بالهنا أولادي

وها تحلى الدنيا دي معايا
طول ما انتِ
يا نبع الخير جايه
ماشعرش في لحظه بأسايا

وتعيشي يامصر
في حريه
وانا ابنك
وانتِ المصريه
وطباعك حلوة
وعصريه
روح قلبي يامصر

الخطوة دي حلوة

الخطوة دي حلوه
يامصر على أرضك
مدي الخطى لقدام
ومترجعش خلفك
الخطوه دي حلوه

بكتب حروفك دايماً
يا مصر في كتابي
وافرح بنور الشمس
هلت على اعتابي
والقى نسيم الليل

يحكيكوا إعجابي
على فرحتي بقتال
منبعها في قلبي
طلعت بفضل رجال
مجهودها إيجابي
كان نفسي اشارك يوم
وأحس بشبابي
والخطوه دي حلوه

بشراك يا ام الخير
فرحك على سينا
طالع معاك الطير
يرقص على المينا
بايدينا نقطف ثمار

المجد بإدينا
ومن تحتنا الأنهار
دايما بتروينا

وسينا أرض عمار
والحلوه مصريه
ونجاحنا في التنميه
هيزيد بلوجيستيه
ياللي رسمت الطريق
بقنالك الثانية
افتح لنا الأبواب
متعنا بالدنيا
وانهي على الإرهاب
تكمل كده البنيه

والخطوه دي حلوه

عليّ بيوت الايتام
يا مصر في رحابك

تسعد مع الأيام
وتموت فدا ترابك
يا حلوة يا ام الخير
جودي على ولادك
بالصحه والتعليم
كيدي في حسادك
ازرعي في أرض النيل
يكثر في يوم زادك
واحلف بقلبي يمين

لاكتب في أمجادك
ومسيرة التطوير
من خير أجنادك
يلا افرحي بالنور
صلي لأحبائك
الخطوه دي حلوه

إفرحوا يا شباب المحروسة

إفرحوا يا شباب المحروسة
أهي طلعت يخت المحروسة
في الميه بتجري ومحروسة
فكرة أبطالك المدروسة
إفرحوا يا شباب المحروسة
لو طلعت يخت المحروسة
قبل المره دي ماتحلا شي
ولا غنوه بتقولها ولادك
زي الغنوه دي مانلقاشي
افرحي بقتالك يا بلادي
راية الارهاب مابتعلاشي
إفرحوا يا شباب المحروسة

رفعت أعلامك الشرقية
والفرحة في أرض اسماعلية
غنى الأطفال بالعربية
فالتحيا جهودنا المصرية
من بعد ما كانت وهميه
بدأت مشاريع التنمية
إفرحوا يا شباب المحروسة
يوم 8/6 كانت فرحة
وقنالنا التانيه بقت صالحة
وهنفرد حوليها الطرحة
وهنزرع شجره تروح طارحة
وهتكمل أفكار مقترحه
لو حتى قابلنا طيور جارحه
إفرحوا يا شباب المحروسة

الأرض المصرية

غنى المزمار أحلى الأشعار
علشان الأرض المصرية
ضحكت للورد

أرض الفيروز راح بتنادي
على مية نيلك يابلا دي
عطشانه لأفكار أولادي
واهي جاتنا الفرصه الذهبيه
وبدأنا العد

هلت أنوار على شطآنك
والميه بتجري في بستانك
من بعد ما ضحكت لقنالك
راح نبني البنيه التحتيه
ونعّلي المجد

الوهم خدعنا سنين وسنين
واليوم ده هانبدأ في التمكين
وهنفدي بلادنا من الشياطين
وهنلقى الحلوة المصرية
في إيديها الشهد

ونزلنا الى الدنيا الفانيه
والأرض هي الجنه الثانيه
والعمر ده محسوب بالثانيه
نفديها الارض المصريه
ونصون العهد

راح نبني ونزرع نتسابق
وهنسى تأخر في السابق
وهنثبت ذاتنا ونتعاقب
وهناخد الجايزة الفخرية
الى يوم اللحد

أولادنا بجد هاترعاك
وهترفع رايتك في سماك
ونعيش العمر بنهواك
ونصلي وندعي وفي النيّة
جنات الخلد

ولاقينا الفرحة بتبهاها
وفي نبض القلب بنلقاها
بتغني ونغني معاها
محلاها جنودنا المصرية
في حماية الأرض

تعيشي يا مصر

طاف الأمل فوق المدينة
رفرف علمنا على السفينة
وحفرنا قناتنا بأيدينا
وهتعلی رایتنا على المینا
وتعیشي يا مصر

على أرض سینا ورسینا
يابلادنا یاضي عنینا
ضحکتلي موجا وري موجا
والشط بینادي علینا
أنا مش هسیبک وحدانی

طول مانت واقف تحمينا
راح افدي بلدي وخالني
وماخافش لو مين يعاديننا
وتعيشي يا مصر

أحلام ولادي مشغلاني
لما اتقابلنا في صبحيه
ولقيتها في البر التاني
على أرض سينا المصرية
ربك رعاني وسقاني
والنيل ده أصل التنمية
والنصر هيعود من تاني
طول ما الأيادي في إيديّ
وتعيشي يامصر

راح يرجع الزمن الجميل
ويزيد لي خيرك يا بلادي
ويرفرف الطير ع النخيل
وتغني وياه أحفادي
شمس الضحى تنده يانيل
اجري وخضر في الوادي
نزرع أمل في البردويل
وأموت فداكي وأولادي
وتعيشي يا مصر

مش هجاملك

مش هجاملك

ليه تقوللي إني بكذب

ده الأمل في الله أقرب

يعني أشرب كأس مكهرب

لجل أعجب

يا غريب الفكر اشرب

كأس يخلي العقل يقرب

مش هجاملك

الزمان خلاني افكر ألف مره

مش في خطوه تجيب مضره

وأفضل أكتب للزمان ده
وابقى عمدة ناحيه جامده

ناحيه تقدر ع المسانده
مش معاول هدم جاحده
اصحي يابني بلاش معانده

في الزمان ده
مش هجاملك

مصر أكبر من جراحنا
نفتديها كمان بروحنا
والمؤامرة ضد جيشنا
واقصصانا وقوت ولادنا
دول أهم من طموحنا

ارفعوا راية المحبه
وابدأوا خطوه في كفاحنا
تطلع الأحلام تفتّح

زهرة تضحك يوم فرحنا
وفي لقانا في صباحنا
يمنع الأحزان وضوحنا
ومش هجامك

صبح على مصر

صبح على مصر وسمي

مصر الحبيبة دي أمي

وده أجمل لحن شغلني

أفديها بروحي ودمي

صبح على مصر

صبح على مصر وشاور

في اديها الحلوه أساور

وفروع النيل بتحاور

راح تجري في كل محاور

ولا يقدر أي مناور

يحرم أولادها النصر

صبح على مصر

صبح على مصر يا صاحبي

وازرع بستانك يطرح

واجري يا أستاذ واسبقني

ونجاح العلم ده أصلح

راح يكبر حلمنا أكثر

وفداك ولادنا يا مصر

صبح على مصر

صبح على مصر وعلم

كل الأجيال تتكلم

أنا شايفك أحلى معلم

وتملّي تعدي تسلم
مهني ولباقتك عاليه
قوم بينا نعمر مصر
صبح على مصر
راح نلقي الورد بيضحك
وأملنا في بكره أكيد
مين يقدر يكره حضنك
وفي قلبه الشوق بيزيد
راح نفضل دائماً جنبك
نبني ونعلي القصر
صبح على مصر

صبح على مصر يا خالي
وبلاش تخسر أمثالي

اسمعي وخذ بسؤالي
ربك رحمن متعالى
يرفع أقوام في العالى
وتعالى نصلي العصر
صبح على مصر
صبح على مصر ونادي
راح تفرح كل ولادي
رجع أحلام أجدادي
وبلاش تخلع أوتادي
خليها على الله يا بادي
يرحمنا في يوم الحشر
صبح على مصر
صبح على مصر وصلي
ده صلاة الفرض تعلّي

متقولش ده ليه يحصلي
ايدك المغلولة تملي
هاخذها الموت ويولي
ومفيش في الأمر ده عسر
صبح على مصر

الإرهابي

ما تنساش إنك تراب

يمكن تهب الريح

وتاخذ كنس

ما تنساش إنك شوية ميّه

تبخرها حرارة الشمس

ما تنساش إنك شبه ثمار التوت

راح تنعصر باللمس

ما تنساش يمكن تنام مرضان

وما تشوفش ليالي العرس

ما تنساش إنك خبر مشنوم

عدي عليه اليوم

وأصبح أمس

ما تنسأش إنك يا نجم كبير
طالع لرب الكون
وهايحاسبك
وليه بتتنكر لكل الخلق
حاسس بإنك فوق
مافيش قدك
إمتى يا صاحبي تفوق
تبكي دموع الشوق
وتعيش حياة أهلك
أرضك وعرضك دول أهم اتنين
راح يعدلوا صورتك
ازاي تعيش هلفوت
تتحامى في النبوت
وتقول معاك زندق

مش قوتك تحميك
ولا سطوتك تغنيك
عن كل من حولك
يمكن تختلف نظرات
يمكن تنزل العبرات
تشعر كده بضعفك
افتكر إنك حرقت صغار
إنك ظلمت كبار
إنك أسير نفسك
إرجع لأرضك يوم
إمسح دموع مظلوم
راح يرحمك ربك
بكره النفس والقوت
راح ينقطع وتموت

وبيحضنك قبرك

متقولش يوم إرهاب

ولا تخترع أسباب

إرفع شعار وطنك

عاوزك تكون عصفور

شاكر لرب غفور

يهديك إلي رزقك

إسمعلي يا إنسان

نبح الهدى قرآن

ما تقولش فيس أو وتس

أسجد لرب الكون

صلي بقلب حنون

أفضل علاج للنفس

وطني الجريح

وطني الجريح منهار
من سطوة الفجّار
عمال ألمم فيه
واعلي في الأسوار
وكفاية نوم ودوار
على شط جرف هار
شايفك يا وطني حزين
والشكوى مش لموذار
وابنك يا مصر أمين
راح يبتدي المشوار
ده الوحدة قول الله

لو جفت الأبيار
قادر بكن فيكون
ينزل مطر إعصار
وبقطرة تلقى النور
ببلاغى فى الأزهار
ويغنى كل الطير
أحلى النغم أذكار
ورباط بلاد النيل
ده موحدّه الجبار
ذا النون حماه يقطين
اذ نادى للغفار
مهما ابتعدنا سنين
راح تلتقى الأفكار
متقولش أمر عسير

وهانرضى بالأقدار
وضعك يا مصر كبير
مش كورة ولا قمار

جنة في أرض الله
محفوفة بالأخطار
حب الوطن والدين
من أعظم الأسرار

أم العرب

الأرض دي أم البشر
منها اتخلقتنا كلنا
الصافنات و الكائنات
حتى النبات من حولنا
من عمر يوم أو ميت سنه
كل الشباب دول مننا
لو كان أمير في الأبهاء
أو صار كبير عين المنى
فكر الشباب في مصرنا
لازم يوافق ديننا
أصله السماحه والرضا

وحديث نبينا يقول لنا
حرام يضيع فينا الأمل
ونعيش حيارى ف أرضنا
حضنك إلينا كلنا
مسلم مسيحي يضمننا
وصى بها سيدنا النبي
أم العرب دي أمنا

مين قال يا مسلم تفتري
أو حتى يوم تنسى القيم
حاول تفكر في الخطى
قبل المصايب والندم
خاتك شيطانك والهوى
ونسيت تحارب غيهم

والله الحديث برضه أليم
ورميت ولادك وأمهم
عمك هبيل أخلص لربه
خانه قبيل قال ينعدم

فسدت حياتهم امرأة
أكبر حدث منذ القدم
جد العرب سيدنا اسماعيل
لكن في مصر خوالهم
يعني امرأة سبب النسب
أم اسماعيل من قبطهم

سيدنا النبي خلاً القساوس
تعمل طقوسها في مسجده

وماكانش يسمح للوساوس
تخلف أرائه ومقصده
وده برضه فضل من الرسول
مطلوب قلوبنا ترده
طب ليه تشارك في الدمار
وازاي هتقدر تبعده
أصبحت قاسي ومستعار
وأديت عجوزه مُسيّده
متقولش عقلك في الإطار
خبيتك كبيره معده
وازاي تدارى في بلوتك
صارت حياتكوا مهدده
ونسيت تفكر في الأصول
لما وقعت في مصيّده

مصر الجببيه دي أمنا
إحساس يجيلنا في العَرَبْ
أجمل مقام في قلبنا
ويبان إيقاعه في الطرب
معقول تهينها في شخصها
ويموت رباط المغترب
ده كل أم في أرضها
نبض السعيد المضطرب
واليوم ده واجب نعتذر
أسفاً على كل الشغب
أسفاً على فعل البذاري
في دربهم عند العطب
إلى وجه مصر فإنها
أم إلى كل العرب

أيام الغربة

من أول عمري وأنا صغير
متهني في حزنك يا بلادي
واليوم دا كبرت وبتغير
بجري وبتحرك في الوادي
ولا مرة هجرتك يا بلادي
من أول عمري

وخذوني في يوم للجهادية
ومعايا كتير من أصحابي
ورفعت سلاحي في أيدي
وسهرت أحميكي بشبابي

ولا مرة نسيته يا بلادي
من أول عمري
وسافرت بعيد لبلاد ثانية
من بعد العز في أحضانك
والله يا مصر أم الدنيا
محتاج إحسانك وحنانك
مشتاق لترابك يا بلادي
من أول عمري
بتألم في الغربة انا وحدي
واشكيلك من لوعة قلبي
يا حبيبتي انا باقي على عهدي
وما فيش للكره مكان عندي
أنا جايلك بكره يا بلادي
وده أول عمري

التقسيم والتقسام

التقسيم....

في كلامنا العربي

إن اللفظ....

ده إسم وفعل

ولكن. حرف

دا تابع ليهم

واستقلاله....

ده أمر مخل

والتقسام....

دي موسيقي يا صاحبي

وبتهاواها الناس بالفعل

أما وطننا العربي ده كله
كان في الماضي يساع الكل

جالنا زعيط
ومعيط يلاعبنا
خلى ولادنا في ضعف وذل

خير أراضينا
ده مش للمجرم
ليه تشعلها صراع ياأخينا
طول العمر بتبني وتهدم
ما بتعلاش بالتلج مدينة
كيانات شاردة وأفكار بارده
مهما تعكر عقلنا زينة

مش راح نسمع رأي المردة
ولا راح ننسى فضل نبينا
ومتقوليش أسلاك وحواجز
يوم راح تحمي من يعاديننا
تقسيم إيه راح تحلم بيه
مش راح تنجح في انقساماته
ولا دستور راح تكتب فيه
ويخليك تبقى الأفوكاتو
والتقاسيم دي حياتي وفني
عود أو ناي من غير إيقاعاته
مش تقاسيم أفريقي وهندي
ولا أوركستر غربي بذاته
يعني الوطن العربي ده جملة
نبضها فينا قبل صفاته

فرحة شهيد

مبروك لفرحك يا شهيد
طواف في جنة ربنا
طاير مخلد من زمن
مش زي عصفور عندنا
ومفيش موانع تحجزك
والأرض أصلاً مهدنا
فارد جناحك في السما
دمك معطر في الدُّنا
بين الملائكة ومننا
صورتك تَمَلِّي في قلبنا

مبروك لفرحك وانت حي
بين الدارين يوم زفتك

كل الحبايب وانت جي
شايلة الشموع في دفتك
زينة الشباب ومالكش زي
وفدا الوطن من أسرتك
نورك معطي أحلى ضي
ساعة اللقا في جنتك
مبروك لفرحك ياشهيد

أنشودة المعلم

أفدي بلادي
من العدا
أنا من جنودها
مهما عانيتُ
من الردي
أرعى حدودها
بالحرب كان
أو بالسلام
عهدي معاك
يا بلدنا بالعمار

بارك يا رب
في علمنا
بارك جهودنا
تكبر آمالنا
في قلبنا
يكبر وجودنا
هيا بنا
على الدوام
نبني بلدنا
بالوئام لا بالدمار

من عهد مينا
في التاريخ
احنا ابتدأنا

نرسم خطانا
على الطريق
نحلم لبُكرا

نقرا ونكتب
يا تاريخ
نزرع نعمر
في الصحاري
ليل نهار

وعن رسول الله
أطلب هداية الله
في كل أرض الله
العلم نور الله

خيراً لمن عُلِمَ
وللتعليم
فأنا المعلم
أعشق الأذكار

محتوى الكتاب

2 بطاقة الكتاب
3 على سبيل التقديم
4 الإهداء
5 قوم ياوطن
8 ضميني يا مصر
12 الخطوة دى حبيبتي
14 الحلم الصغير
18 أنا ابن بطنك يابلد
22 ياساكنة فى قلبى يابلادى
25 يا مصر منورة دايمًا
27 أعذرينى
31 مركبنا عدى القتال
35 فى الواقع
38 منصورين
40 أنا حلم عمري
44 على موعد
50 روح قلبى يا مصر

54 الحلوة دى بلدى
59 إفرحوا يا شباب المحروسة
61 الأرض المصرية
65 تعيشى يامصر
68 مش هجاملك
71 صبح على مصر
76 الإرهابى
80 وطنى الجريح
83 أم العرب
88 أيام الغربية
90 التقسيم والتقسام
93 فرحة شهيد
95 أنشودة المعلم
99 محتوى الكتاب